

四庫全書

史部

欽定四庫全書

歷代帝王宅京記卷十八

崑山顧炎武撰

宋州

宋

宋史地理志曰大中祥符七年建應天府為南京宮城

周二里三百一十六步門曰重熙頒慶殿曰歸德

元豐六年

賜度僧牒修外城門及西橋寺

京城周回一十五里四十步東二門南

欽定四庫全書

日延和北曰昭仁西二門南曰順城北曰回鑾南一門
曰崇禮北一門曰靜安中有隔城又有門二東曰承慶
西曰祥輝其東又有關城南北各一門葉夢得石林燕
語曰應天府藝祖肇基之地祥符七年建南京詔即衙
城為大內正殿以歸德為名雖降圖營建而實未嘗行
天禧中王曾為守請減省舊制別為圖以進亦但報聞
其後但修祥輝崇禮二門而已元豐間蘇頌自南京還
朝請以曾奏先修歸德一殿約為屋百間神宗亦未暇

也惟正門以真宗觀醵賜名重熙頒慶慶樓猶是雙門
未嘗改作

玉海曰宋州景德三年二月甲申升應天府祥符七年
正月丙辰升南京詔曰洪惟藝祖歷試是邦同幽土之
始基應春陵之王氣稽唐氏晉陽之制肇建新都

地理通釋曰南京應天府闕伯所居商丘周為宋國漢
為梁國隋唐為宋州太祖以歸德軍節度使即位定有
天下之號曰宋景德四年升應天府大中祥符七年升

南京高宗即位於此

臨安

宋

宋史地理志曰行在所建炎三年閏八月高宗自建康如臨安以州治為行宮宮室制度皆從簡省不尚華飾垂拱大慶文德紫宸祥曦集英六殿隨時易名實一殿重華慈福壽慈壽康四宮重壽寧福二殿隨時易額實德壽一宮延和崇政復古選德四殿本射殿也慈寧殿

紹興九年以太
后有歸期建

欽先孝思殿

十五年建在
崇政殿東

翠寒殿

孝宗作

損齋

紹興末建貯經史
書為燕坐之所

東宮

在麗正門由孝宗莊文
景獻光宗皆嘗居之

講

筵所資善堂

在行宮門內
因書院而作

天章龍圖寶文顯猷徽猷敷

文煥章華文寶謨九閣寶天章一閣

輿服志曰宮室汴宋之制侈而不可以訓中興服御惟

務簡省宮殿尤樸皇帝之居曰殿總曰大內又曰南內

本杭州治也紹興初創為之休兵後始作崇政垂拱二

殿久之又作天章等六閣寢殿曰福寧殿淳熙初孝宗

始作射殿謂之選德殿八年秋又改後殿擁舍為別殿
取舊名謂之延和殿便坐視事則御之他如紫宸文德
集英大慶講武惟隨時所御則易其名紫宸殿遇朔受
朝則御焉文德殿降赦則御焉集英殿臨軒策士則御
焉大慶殿行冊禮則御焉講武殿閱武則御焉其實垂
拱崇政二殿權更其號而已二殿雖曰大殿其修廣僅
如大郡之設廳淳熙再修止循其舊每殿為屋五間十
二架修六丈廣八丈四尺殿南簷屋三間修一丈五尺

廣亦如之兩朶殿各二間東西廊各二十間南廊九間
其中為殿門三間六架修三丈廣四丈六尺殿後擁舍
七間即為延和其制尤卑陞階一級小如常人所居而
已奉太上則有德壽宮重華宮壽康宮奉聖母則有慈
寧宮慈福宮壽慈宮德壽宮在大內北望仙橋故又謂
之北內紹興三十二年所造宮成詔以德壽為名高宗
為上皇御之重華即德壽宮也孝宗遜位御之壽康宮
即福寧宮也初丞相趙汝愚議以祕書省為泰寧宮已

而不果行以慈懿皇后外第為之上皇不欲遷因以舊
寧福殿為壽康宮光宗遜位御之大內苑中庭殿亦無
增其名稱可見者僅有復古殿損齋觀堂芙蓉閣翠寒
堂清華閣櫺木堂隱岫澄碧倚柱隱秀碧琳堂之類此
南內也北內苑中則有大池引西河水注之其上疊石
為山象飛來峰有樓曰聚遠禁籞周回四分之東則香
遠清深月臺梅波松菊三徑清妍清新芙蓉岡南則載
欣欣射廳臨賦燦錦至樂半丈紅清曠瀉碧西則冷

泉文杏館靜樂浣溪北則絳華旱船俯翠春桃盤松皇
太子宮曰東宮其未出閣但聽讀於資善堂堂在宮門
內已受冊則居東宮宮在麗正門內紹興三十二年始
置孝宗居之莊文太子立復居之光宗為太子孝宗謂
輔臣曰今後東宮不須勅建朕宮中宮殿多所不御可
移修之自是皆不別建淳熙三年始勅射堂一為游藝
之所圃中有榮觀玉淵清賞等堂鳳山樓皆宴息之地
也幕殿即周官大小次也東都時郊壇大次謂之青城

祀前一日宿齋詣焉其制中有二殿外有六門前曰泰
裡後曰拱極東曰祥曦西曰景曜東偏曰承和西偏曰
迎禧大殿曰端誠便殿曰熙成中興後以事天尚質屢
詔郊壇不得建齋宮惟設幕屋而已其制架木而以葦
為幃上下四旁周以幄帟以象宮室謂之幕殿及行事
又於壇所設小次大小次之外又有望祭殿遇雨則行
事於中東都時為之瓦屋五間周圍重廊中興後惟設
葦屋蓋倣清廟茅屋之制也

玉海曰紹興四年將還臨安始命有司建太廟十二年
作太社太稷皇后廟都亭驛太學十三年築園丘景靈
宮高禋壇祕書省十五年作內中神御殿十六年廣太
廟建武學十七年作玉津園太乙宮萬壽觀十八年築
九宮貴神壇十九年建太廟齋殿二十年作玉牒所二
十二年作左藏庫南省倉二十五年建執政府二十六
年築兩相第太醫局二十七年建尚書六府凡定都二
十年而郊廟宮省始備

方回南渡後郊丘考曰紹興十三年正月禮部太常寺申請命殿前都指揮使楊存中知臨安府王喚因國朝禮制建郊丘於國之東南及建青城齋宮在嘉會門外南四里龍華寺西為壇四成上成從廣七丈再成十二丈三成十七丈四成二十二丈分十二陛陞七十二級壇及內壝七百九十步中外壝通二十五步燎方一丈高一丈二尺在壇南二十步內地餘四十步以列仗衛惟青城齋宮及望祭殿詔勿營臨事則惟幕屋略倣汴

京制度大殿曰端成便殿為熙成其外為泰裡門

隆興三年以寢殿在淨明寺易安齋去青城稍遠乃徙寺之舊熙成殿於端成殿後以充寢殿

又曰紹興四年就臨安行宮合祀天地並侑祖宗時行宮草創一大殿大朝會榜曰文德殿策進士唱名榜曰集英殿秋享榜曰明堂殿初太廟寓温州至是已建新太廟於臨安而景靈宮未建但即常御殿設位朝獻紹興十三年始建景靈宮於新莊橋之西

岳珂程史曰行都之山肇自天目負山之丘有門曰朝天南循其陜為太室又南為相府斗拔起數峰為萬松八盤嶺下為釣天九重之居右為複嶺設周廬之衛止焉舊傳識記曰天目山垂兩乳長龍騫鳳舞到錢塘山明水秀無人會五百年間出帝王錢氏有國世臣事明朝不欲其語之聞因更其末句曰異姓王識實不然也建炎元二之災六龍南巡四朝奠都帝王之真於是乎驗朝天之東有橋曰望仙仰眺吳山如卓馬立顧紹興

間望氣者以為有鬱葱之符秦檜顓國心利之請以為
賜第其東偏即檜家廟而西則一德格天閣之故基也
檜死煇猶戀戀不能決去請以其姪常州通判烜為光
祿丞留蒞家廟以為復居之萌芽言者風聞遂請罷烜
併遷廟主於建康遂空其居高宗將倦勤詔即其所築
新宮賜名德壽居之以膺天下之養者二十有七年清
蹕躬朝歲時煜奕重華繼御更慈福壽慈凡四侈鴻名宮室
實皆無所更稍北連甍為今佑聖觀蓋普安故邸莊文

魏王光宗皇帝實生是間今上亦於此開甲觀之祥

陳隨應南渡行宮記曰杭州治舊錢王宮也紹興因以
為行宮皇城九里入寧門左進奏院玉堂右中殿外庫
至北宮門循廊左序巨璫幕次列如魚貫祥曦殿朶殿
接修廊為後殿對以御酒庫御藥院慈元殿外庫內侍
省內東門司大內都巡檢司御廚天章等閣廊回路轉
衆班排列又轉內藏庫軍器庫又轉便門垂拱殿五間
十二間修六丈廣八丈四尺簷瓦三間修廣各丈五朶

殿四兩廊各二十間殿門三間內龍墀折檻殿後擁舍
七間為延和殿右便門通後殿殿左一殿隨時易名明
堂郊祀曰端誠策士唱名曰集英宴對奉使曰崇德武
舉及軍班授官曰講武東宮在麗正門內南宮門外本宮
會議所之側入門垂楊夾道間芙蕖環朱闌重至外宮
門節堂後為財帛生料二庫環以官屬直舍轉窰子入
內宮門廊右為贊道春坊直舍左講堂七楹扁新益外
為講官直舍正殿向明左聖堂右祠堂後凝華殿瞻業

堂環以竹左寢室右齊安位內人直舍百二十楹左彝齋太子賜號也接繡香亭便門通繹巳堂重簷複屋昔楊太后垂簾於此曰慈明殿前射圃竟百步環修廊右博雅樓十二間左轉數十步雕欄花甃萬卉中出秋千對陽春亭清霽亭前芙蓉後木樨玉質亭梅繞之由繹巳堂過錦膳廊一百八十間直通御前廊外即後苑梅花千樹曰梅崗亭曰冰花亭枕小西湖曰水月境界曰澄碧牡丹曰伊洛傳芳芍藥曰冠芳山茶曰鶴丹桂曰

天闕清香堂曰本支百世祐聖祠曰慶和泗洲曰慈濟
鍾呂曰得真橘曰洞庭佳味茅亭曰昭儉木香曰架雪
竹曰賞靜松亭曰天陵偃蓋以日本國松木為翠寒堂
不施丹雘白如象齒環以古松碧琳堂近之一山崔巍
作觀堂為上焚香祝天之所吳知古掌焚修每三茅觀
鐘鳴觀堂之鐘應之則駕興山背芙蓉閣風帆沙鳥履
舄下山下一溪縈帶通小西湖亭曰清漣恠石夾列獻
瑰逞秀三山五湖洞穴深杳豁然平朗翬飛翼拱凌虛

樓對瑞慶殿損齋緝熙崇政殿之東為欽先孝思復古
紫宸等殿木園即福寧殿射殿曰選德坤寧殿貴妃昭
儀婕妤等位宮人直舍螳聚焉又東過閣子庫睿思殿
儀鸞修內八作翰林諸司是謂東華門

元

元史世祖本紀曰至正二十二年春正月庚辰毀宋郊
天臺僧格言嘉木揚喇勒智云會稽有泰陵寺宋毀之
以建寧宗等攢宮錢塘有龍華寺宋毀之以為南郊皆

勝地也宜復為寺以為皇上行宮祈壽時寧宗等攢宮
已毀建寺勅毀郊天臺亦建寺焉

二十五年春二月西僧嘉木揚喇勒智言以宋宮室為
塔一為寺五

臨潢

遼

遼史兵衛志曰遼建五宗臨潢契丹故壤遼陽漢之遼
東為渤海故國中京漢遼西地自唐以來契丹有之析

津大同故漢地

又曰太建建皇都於臨潢府太宗定晉晉王石敬瑭來獻十六城乃定四京改皇都為上京

地理志曰上京臨潢府本漢遼東郡西安平之地新莽

曰北安平太祖取天梯孟古博囉三山之勢於葦甸射

金齟

側角反
箭名

箭以識之謂之龍眉宮神冊三年城之名

曰皇都天顯十三年更名上京府曰臨潢洮流河自西北南流遶三面東入於曲江其北東流為安春河又有

御河沙河黑河潢河鴨子河塔魯河狼河蒼耳河輞子
河臚胸河陰涼河鴛鴦湖興國惠民湖廣濟湖鹽灤百
狗灤大神淀馬孟山兔兒山野鵲山鹽山鑿山松山平
地松林大斧山列山庫哩山魯塔山唐所封達呼哩氏勒
特王有墓存焉

又曰上京太祖創業之地負山抱海天險足以為固地
沃宜耕植水草便畜牧金甌一箭二百年之基壯矣天
顯元年平渤海歸乃展郭郭建宮室名以天贊起三大

殿曰開皇

太祖紀二年冬十月己亥朔建明王樓七年春三月神速姑劫西樓楚明王樓八年冬十

一月甲子朔建開皇殿於明王樓基

安德五鑾中有歷代帝王御容每月

朔望節辰忌日在京文武百官並赴致祭又於內城東

南隅建天雄寺奉安烈考宣簡皇帝遺像是歲太祖崩

應天皇后於義節寺斷腕致太祖陵即寺建斷腕樓樹

碑焉太宗援立晉遣宰相馮道劉昫等持節具鹵簿法

服至此冊上太宗及應天皇后尊號太宗詔藩部並依

漢制御開皇殿闢承天門受禮因改皇都為上京城高

二丈不設敵樓幅幘二十七里門東曰迎春曰雁兒南
曰順陽西曰金鳳曰西雁兒曰南福其北謂之皇城高
三丈有樓櫓門東曰安東南曰大順西曰乾德北曰拱
宸中曰大內內南門曰承天有樓閣東門曰東華西曰
西華此通內出入之所正南街東留守司衙次鹽鐵司
次南曰龍寺街南曰臨潢府其側臨潢縣縣西南崇孝
寺承天皇后建寺西長泰縣又西天長觀西南國子監
監北孔子廟廟東節義寺又西北安國寺太宗所建寺

東齊天皇后故宅東有元妃宅即法天皇后所建也其南具聖尼寺綾錦院內省司麴院贍國省司二倉皆在大內西南八作司與天雄寺對南城謂之漢城南當橫街各有樓對峙下列井肆東門之北潞縣又東南興仁縣南門之西回鶻營回鶻商販留居上京置營居之西南同文驛諸國信使居之驛西南臨潢驛以待夏國使驛西福先寺寺西宣化縣西南定霸縣縣西保和縣西門之北易俗縣縣東遷遼縣

周廣順中胡嶠記曰上京西樓有邑屋市肆交易無錢而用布有綾錦諸工作宦者翰林伎術教坊角觝儒僧尼道士皆中國人并汾幽薊為多

宋大中祥符九年薛映記曰上京者中京正北八十里至松山館七十里至崇信館九十里至廣寧館五十里至姚家寨館五十里至咸寧館三十里渡橫水石橋旁有饒州唐于契丹嘗置饒樂令渤海人居之五十里保和館渡黑水河七十里宣化館五十里長泰館館西二

十里有佛舍民居即祖州又四十里至臨潢府自過崇信館乃契丹舊境其南奚地也入西門門曰金德內有臨潢館子城東門曰順陽北行至景福門又至承天門內有昭德宣政二殿與毬廬皆東向臨潢西北二百餘里號涼淀在饅頭山南避暑之所多豐草掘地丈餘即有堅冰

國語解曰遼有四樓在上京者曰西樓木葉山曰南樓龍化州曰東樓唐州曰北樓歲時游獵常在四樓間

五代史四夷附錄曰安巴堅以其所居為上京起樓其間號西樓又於其東十里起東樓北三百里起北樓南木葉山起南樓射獵其間契丹好鬼而貴日每月朔旦東向而拜日其大會聚視國事皆以東向為尊四樓門屋皆東向

金史地理志曰臨潢府地名西樓遼為上京國初因稱之天眷元年改為北京天德二年改北京為臨潢府路有天平山好水川行宮地大定二十五年命名有色爾

龍地熙宗皇統九年嘗避暑於此有陷泉國言曰埒
伊有哈納卓果斯鄂博穆爾哈沙地

歷代帝王宅京記卷十八

欽定四庫全書

歷代帝王宅京記卷十九

崑山顧炎武撰

幽州

遼

遼史太宗紀曰會同元年十一月晉遣趙瑩奉表來賀
以幽薊瀛莫涿檀順嬀儒新武雲應朔懷蔚十六州并
圖籍來獻於是詔以皇都為上京府曰臨潢升幽州為

南京南京為東京

地理志曰南京析津府本古薊州之地高陽氏謂之幽陵陶唐曰幽都有虞析為幽州商復為冀州周職方東北曰幽州武王封太保與於燕漢為燕國廣陽國後漢為廣陽郡隋為幽州總管唐置大都督府改范陽節度使晉高祖以遼有援立之勞割幽州等十六州以獻太宗升為南京

又曰燕京城方三十六里崇三丈衡廣一丈五尺敵樓

戰櫓具八門東曰安東迎春南曰開陽丹鳳西曰顯西
清晉北曰通天拱宸大內在西南隅皇城內有景宗聖
宗御容殿二東曰宣和南曰大內內門曰宣教改元和
外三門曰南端左掖右掖左掖改萬春右掖改千秋門
有樓閣毬場在其南東為永平館皇城西門曰顯西設
而不開北曰子北西城巔有涼殿東北隅有燕角樓坊
市廐舍寺觀蓋不勝書其外有居庸松亭榆林之關

榆林

疑當作
臨渝

古北之口桑乾河高梁河石子河大安山燕山

中有瑤嶼府曰幽都軍曰盧龍開泰元年落軍額

聖宗紀曰開泰元年十月甲午朔改幽都府為析津府
薊北縣為析津縣幽都縣為宛平縣

興宗紀曰重熙五年五月壬戌詔修南京宮闕府署宋
王曾上契丹事曰自雄州白溝驛渡河四十里至新城
縣古督亢亭之地又七十里至涿州北渡范水劉李河
六十里至良鄉縣渡盧溝河六十里至幽州號燕京子
城就羅郭西南為之正南曰啟夏門門內有元和殿東

門曰宣和城中坊閤皆有樓有憫忠寺本唐太宗為征
遼陣亡將士所造又有開泰寺魏王耶律漢寧造皆遣
朝使游觀南門外有于越王廨為宴集之所門外永平
館舊名碣石館清和後易之南即桑乾河

金

金史地理志曰中都遼會同元年為南京開泰元年號
燕京海陵貞元元年定都以燕乃列國之名不當為京
師號遂改為中都

天德三年始圖上燕城宮室制度三月命張浩等增廣
燕城城門十三東曰施仁曰宣曜曰陽春南曰景風
曰豐宜曰端禮西曰麗澤曰顯華曰彰義北曰會城曰
通元曰崇智曰光泰浩等取真定府潭園材木營建宮
室及涼位十六

應天門十一楹左右有樓門內有左右翔龍門及日華
月華門前殿曰太安左右掖門內殿東廊曰敷德門太
安殿之東北為東宮正北列三門中曰粹英為壽康宮

母后所居也西曰會通門門北曰承明門又北曰昭慶門東曰集禧門尚書省在其外其東西門左右嘉會門也門有二樓太安殿後門之後也其北曰宣明門則常朝後殿門也北曰仁政門旁為朶殿上為兩高樓曰東西上閣門內有仁政殿常朝之所也

宮城之前廊東西各二百餘間分為三節節為一門將至宮城東西轉各有廊百許間馳道兩旁植柳廊脊覆碧瓦宮闕殿門則純用碧瓦應天門舊名通天門大定

五年更七年改福壽殿曰壽安宮明昌五年復以隆慶宮為東宮慈訓殿為承華殿承華殿者為皇太子所居之東宮也泰和殿泰和二年更名慶寧殿又有崇慶殿魚藻池瑤池殿位貞元元年建有神龍殿又有觀會亭又有安仁殿隆德殿臨芳殿皇統元年有元和殿有常武殿有廣武殿為擊球習射之所

京城北離宮有大寧宮大定十九年建後更為寧壽又更為壽安明昌二年更為萬寧宮瓊花苑有橫翠殿寧

德宮西園有瑤光臺又有瓊花島又有瑤光樓皇統元年有宣和門正隆二年有宣華門又有撒合門

大金國志曰海陵煬王遣左右丞相張浩張通古左丞蔡松年調諸路夫匠築燕京宮室皇城周九里三十步自天津橋之北曰宣陽門中門繪龍兩偏繪鳳用金釘之中門惟車駕出入乃開兩偏分雙隻日開一門過門有兩樓曰文曰武文之轉東曰來寧館武之轉西曰會同館正北曰千步廊東西對焉廊之半各有偏門向東

曰太廟向西曰尚書省至通天門後改名應天樓高八丈朱門五飾以金封東西相去一里餘又各設一門左曰左掖右曰右掖內城之正東曰宣華正西曰玉華北曰拱辰及殿凡九重殿凡三十有六樓閣倍之正中位曰皇帝正位後曰皇后正位位之東曰內省西曰十六位乃嬪妃居之西出玉華門曰同樂園若瑤池蓬瀛柳莊杏村皆在焉都城四圍凡七十五里城門十二每一面分三門其正東門四旁又設兩門正東門宣曜陽春

施仁正西曰顯華麗澤彰義正南曰豐宜景風端禮正

北曰通元會城崇智

史有光泰門

此四城十二門也此外有

宣陽門即內城之南門也上有重樓制度宏大三門並
立中門常不開惟車駕出入通天門即內城之正南門
也四角皆堞樓瓦皆琉璃金釘朱門五門列焉常扁惟
大禮祫享則由之宣華乃內城之正東門玉華則西門
也左掖東偏門右掖西偏門各有武夫守衛拱辰即內
城正北門也又曰後朝門制度守衛與玉華宣華等金

碧輦飛規模宏麗矣

又曰初忠獻王尼雅滿有志于都燕因遼人宮闕於內外
城築四城每城各三里前後各一門樓櫓城塹悉如邊
城每城之內立倉廩甲仗庫各穿複道與內城通時陳
王烏克紳及韓常笑其過計忠獻王曰百年當以吾言為
信及海陵煬王定都欲撤其城翟天祺曰忠獻王開國
元勲置此當有說乃止及衛紹王時蒙古軍至乃命京
城富室遷入東子城百官入南子城宗室保西城戚里

保北城各分守兵二萬大興尹烏陵用章命京畿諸將
毀各橋梁瓦石悉運入四城往來以舟渡運不及者投
之於水拆近城民屋為新納之城中蒙古兵攻城四城
兵皆迭自城上擊之蒙古凡比歲每攻不能克

范石湖攬轡錄 興陵見宋使儀衛戊子早入見循東
西御廊北行廊幾二百間廊分三節每節一門將至宮
城廊即東轉又百許間其西亦然亦有三出門中馳道
甚濶兩旁有溝上植柳廊脊皆以青琉璃瓦覆宮闕門

戶即純用之北即端門十一間曰應天之門下開五門
兩挾有樓如左右昇龍之制東西兩角樓端門內有左
右翔龍門日華月華門前殿曰大安殿使人自左掖門
入北循大安殿東廊入敷德門東北行直東有殿宇門
曰東宮直北西南列三門中曰書英是故壽昌殿母后
所居西曰會通門自會通北入承明門又北則昭慶門
東則集禧門尚書省在門外東西則左右嘉會門二有
樓即大安殿後門之後至幕次黑布拂廬待班有頃入

宣明門即當朝後殿門也門內庭中列衛士二百許人貼金雙鳳幙頭團花紅錦衫散手入仁政隔門至仁政殿下團鳳大花氍毹可半庭殿兩旁有朵殿朵殿上兩高樓曰東西上閣門兩廊悉有簾幕中有甲士東西御廊循簷各列甲士東立者紅葦甲金纏竿槍黃旗畫青龍西立者碧葦甲金纏竿槍白旗畫黃龍至殿下皆然惟立於門下者錦袍持弓矢殿西階襍列儀物障節之屬如道家醮壇威儀之類使人由殿下東行上東街却轉

南由露臺北行入殿闕謂之欄子金主幞頭紅袍玉帶
坐七寶榻皆有龍水大屏風四壁帶幕皆紅繡龍拱斗
皆有繡衣兩楹間各有大出香金獅蠻地鋪禮佛毬可
一殿兩旁玉帶金魚或金帶者十四五人相對列立遙
望前後殿屋崛起甚多制度不經工巧無遺力煬王亮
始營此都規模出於孔彥舟役民夫八十萬兵夫四十
萬作治數年死者不可勝計

元

元史地理志曰大都路唐幽州范陽郡遼改燕京金遷都為大興府元太祖十年克燕初為燕京路總管大興府太宗七年置版籍世祖至元元年中書省臣言開平府闕庭所在加號上都燕京分立省部亦乞正名遂改中都其大興府仍舊四年始于中都之東北置今城而遷都焉九年改大都十九年置留守司二十一年置大都路總管府

京城右擁太行左挹滄海枕居庸奠朔方城方六十里

十一門正南曰麗正南之右曰順承南之左曰文明北之東曰安貞北之西曰健德正東曰崇仁東之右曰齊化東之左曰光熙正西曰和義西之右曰肅清西之左曰平則海子在皇城之北萬壽山之陰舊名積水潭聚西北諸泉之水流入都城而滙於此汪洋如海都人因名焉恣民漁採無禁擬周之靈沼云

世祖本紀曰中統二年冬十月修築京舊城

四年春三月庚子亦黑迭兒丁請修瓊華島不從

至元元年春二月壬子修瓊華島

二年冬十二月己丑瀆山大玉海成勅置廣寒殿

三年夏四月丁卯五山珍御榻成置瓊華島廣寒殿

冬十二月丁亥修築宮城

四年夏四月甲子新築宮城

秋九月壬辰作玉殿於廣寒殿中

五年冬十月戊戌宮城成

八年春二月丁酉發中都真定順天河間平灤民二萬

八千餘人築宮城

九年夏五月乙酉初建東西華左右掖門

十年冬十月初建正殿寢殿香閣周廡兩翼室

十一年春正月己卯朔宮闕告成帝始御正殿受朝賀

夏四月癸丑初建東宮

冬十一月起閣南置大殿及東西殿

十七年冬十二月甲午大都重建太廟成自舊廟奉遷

神主于祔室遂行大享之禮

十九年春二月修宮城太廟司天臺

二十一年秋七月壬申造溫石浴室及更衣殿

成宗紀曰大德八年秋七月辛亥築壇於麗正門外之
南丙位

十年秋八月丁巳京師文宣王廟成

武宗紀曰至大二年夏四月壬午創皇城角樓

仁宗紀曰皇慶二年夏六月甲申建崇文閣於國子監
延祐五年春二月建鹿頂殿於文德後

英宗紀曰至治二年二月甲寅以太廟役軍造流盃池
行殿廣海

順帝紀曰至正十三年春正月甲戌重建穆清閣

九月己丑建皇太子鹿頭殿於聖安殿西

冬十月撤世祖所立蘊殿改建殿宇

十九年冬十月庚申朔詔京師十一門皆築甕城造弔
橋

輟耕錄 至元四年正月城京師以為天下本右擁太

行左注滄海撫中原正南面枕居庸奠朔方峙萬歲山
浚太液池派玉泉通金水縈畿帶甸負山引河壯哉帝
居擇此天府城方六十里二百四十步分十一門正南
曰麗正南之右曰順承南之左曰文明北之東曰安貞
北之西曰健德正東曰崇仁東之右曰齊化東之左曰
光熙正西曰和義西之右曰肅清西之左曰平則大內
南臨麗正門正街曰大明殿曰延春閣宮城周回九里
三十步東西四百八十步南北六百十五步高三十五

尺磚甃至元八年八月十七日申時動土明年三月十五日即工分六門正南曰崇天十二間五門東西一百八十七尺深五十五尺高八十五尺左右塼樓二塼樓登門兩斜廡十門闕上兩觀皆三塼樓連塼樓東西廡各五間西塼樓之西有塗金銅幡竿附宮城南面有宿衛直廬凡諸宮門皆金鋪朱戶丹楹藻繪彤壁琉璃瓦飾簷脊崇天之左曰星拱三間一門東西五十五尺高五十尺崇天之右曰雲從制度如星拱東曰東華七間

三門東西一百十尺深四十五尺高八十尺西曰西華
制度如東華北曰厚載五間一門東西八十七尺深高
如西華角樓四據宮城之四隅皆三垛樓琉璃瓦飾簷
脊直崇天門有白玉石橋三虹上分三道中為御道鐫
百花蟠龍星拱南有御膳亭亭東有拱辰堂蓋百官會
集之所東南角樓東差北有生料庫庫東為柴場夾垣
東北隅有羊圈西南角樓南紅門外留守司在焉西華
南有儀鸞局西有鷹房厚載北為御苑外周圍紅門十

有五內苑紅門五御苑紅門四此兩垣之內也大明宮在崇天門內大明殿之正門也七間三門東西一百二十尺深四十四尺重簷日精門在大明門左月華門在大明門右皆三間一門大明殿乃登極正旦壽節會朝之正衙也十一間東西二百尺深一百二十尺高九十足柱廊七間深二百四十尺廣四十四尺高五十尺寢殿五間東西夾六間復連香閣三間東西一百四十尺深五十尺高七十尺青石花礎白玉石圓碣文石甃地

上藉重茵丹楹金飾龍繞其上四面朱瑣牕藻井間金
繪飾燕石重陞朱欄塗金銅飛雕冒中設七寶雷龍御
榻白蓋金縷褥並設后位諸王百僚集賽官侍宴坐床
重列左右前貯燈漏貯水運機小偶人當時刻捧牌而
出木質銀裹漆甕一金雲龍蜿蜒繞之高一丈七尺貯水
可五十餘石雕象酒卓一長八尺濶七尺二寸玉甗一
玉漏磬一巨笙一玉笙玉笙篴全備於前前懸繡綠珠
簾至冬月大殿則黃猫皮壁帳黑貂褥香閣則銀鼠皮

壁幃黑貂煖帳凡諸宮殿乘輿所臨御者皆丹楹朱瑱
牕間金藻繪設御榻裯褥咸備屋之簷脊皆飾琉璃瓦
文思殿在大明寢殿東三間前後軒東西三十五尺深
七十二尺紫檀殿在大明寢殿西制度如文思皆以紫
檀香木為之縷花龍涎香間白玉飾壁草色髹綠其皮
為地衣寶雲殿在寢殿後五間東西五十六尺深六十
三尺高三十尺鳳儀門在東廡中三間一門東西一百
尺深六十尺高如其深門之外有庖人之室麟瑞門在

西廡中間制度如鳳儀門之外有內藏庫二十所所為
七間鐘樓又名文樓在鳳儀南鼓樓又名武樓在麟瑞
南皆五間高七十五尺嘉慶門在後廡寶雲殿東景福
門在後廡寶雲殿西皆三間一門周廡一百二十間高
三十五尺四隅角樓四間重簷凡諸宮周廡並用丹楹
彤壁藻繪琉璃瓦飾簷脊延春門在寶雲殿後延春閣
之正門也五間三門東西七十七尺重簷懿範門在延
春左嘉則門在延春右皆三間一門延春閣九間東西

有五十尺深九十尺高一百尺三簷重屋柱廊七間廣四十五尺深一百四十尺高五十尺寢殿七間東西夾四間後香閣一間東西一百四十尺深七十五尺高如其深重簷文石甃地藉花毳褥簾帷咸備白玉石重陛朱欄銅冒楯塗金雕翔其上閣上御榻二柱廊中設小山屏林皆楠木為之而飾以金寢殿楠木御榻東夾紫檀御榻壁皆張素畫飛龍舞鳳西夾事佛像香閣楠木寢牀金縷褥黑貂壁幃慈福殿又曰東煖殿在寢殿東

三間前後軒東西三十五尺深七十二尺明仁殿又曰
西煖殿在寢殿西制度如慈福景曜門在左廡中三間
一門高三十尺清灝門在右廡中制度如景曜鐘樓在
景曜南鼓樓在清灝南各高七十五尺周廡一百七十
二間四隅角樓四間玉德殿在清灝外七間東西一百
尺深四十九尺高四十尺飾以白玉甃以文石中設佛
像東香殿在玉德殿東西香殿在玉德殿西宸慶殿在
玉德殿後九間東西一百三十尺深四十尺高如其深

中設御榻簾帷裯褥咸備前列朱欄左右闢二紅門後山字門三間東更衣殿在宸慶殿東五間高三十尺西更衣殿在宸慶殿西制度如東殿隆福殿在大內之西興聖之前南紅門三東西紅門宮各一繚以磚垣南紅門一東紅門一後紅門一光天門光天殿正門也五間三門門高三十二尺重簷崇華門在光天門左廂福門在光天門右各三間一門光天殿七間東西九十八尺深五十五尺高七十尺柱廊七間深九十八尺高五十

尺寢殿五間兩夾四間東西一百三十尺高五十八尺
五寸重簷藻井瑣窗文石甃地藉花毳褥懸珠簾重陛
朱欄塗金雕冒楯正殿鏤金雲龍樟木御榻從臣坐牀
重列前兩旁寢殿亦設御榻褥咸備青陽門在左廡
中明輝門在右廡中各三間一門翥鳳樓在青陽南三
間高四十五尺駮龍樓在明暉南制度如翥鳳後有牧
人宿衛之室壽昌殿又曰東煖殿在寢殿東三間前後
軒重簷嘉禧殿又曰西煖殿在寢殿西制度如壽昌中

位佛像旁設御榻針線殿在寢殿後周廡一百七十二間四隅角樓四間侍女直廬五所在針線殿後又有侍女室七十二間在直廬後及左右浴室一區在宮垣東北隅文德殿在明暉外又曰楠木殿皆楠木為之三間前後軒一間盦頂殿五間在光天殿西北角樓西後有盦頂小殿香殿在宮垣西北隅三間前軒一間前寢殿三間柱廊三間後寢殿三間東西夾各二間文宸庫在宮垣西南隅酒房在宮垣東南隅內庖在酒房之北興

聖宮在大內之西北萬壽山之正西周以磚垣南闢紅門三東西紅門各一北紅門一南紅門外兩旁附垣有宿衛直廬凡四十間東西門外各三間南門前夾垣內有省院臺百司官侍直板屋北門外有審花室五間東夾垣外有宦人之室十七間凌室六間酒房六間南北西門外綦置衛士直宿之舍二十一所所為一間外夾垣東紅門三直儀天殿弔橋西紅門一達徽政院門內差北有盥頂房二各三間又北有屋二所各三間差南

有庫一所及屋三間北紅門外有臨街門一所三間此
夾垣之北門也興聖門興聖殿之北門也五間三門重
簷東西七十四尺明華門在興聖門左肅章門在興聖
門右各三間一門興聖殿七間東西一百尺深九十七
尺柱廊六間深九十四尺寢殿五間兩夾各三間後香
閣三間深七十七尺正殿四面珠懸瑣牕文石甃地藉
以毳褥中設宸屏榻張白蓋簾帷皆錦繡為之諸王百
僚宿衛官侍宴坐牀重列左右其柱廊寢殿亦各設御

榻裯褥咸備白玉石重陞朱闌塗金冒楯覆以白磁碧
瓦琉璃飾其簷脊宏慶門在東廡中宣則門在西廡中
各三間一門凝暉樓在宏慶南五間東西六十七尺延
顯樓在宣則南制度如凝暉嘉德殿在寢殿東三間前
後軒各三間重簷寶慈殿在寢殿西制度同嘉德山字
門左興聖宮後延華閣之正門也正一間兩夾各一間
重簷一門脊置金寶瓶又獨脚門二周閣以紅板垣延
華閣五間方七十九尺二寸重阿十字脊白琉璃瓦覆

青琉璃瓦飾其簷脊立金寶瓶單陞御榻從臣坐牀咸具東西殿在延華閣西左右各五間前軒一間園亭在延華殿後芳碧亭在延華閣後園亭東三門重簷十字脊覆以青琉璃瓦飾以綠琉璃屋脊置金寶瓶徽青亭在園亭西制度如芳碧亭浴室在延華閣東南隅東殿旁有盥頂井亭二間又有盥頂房三間畏吾兒殿在延華閣右六間旁有窰花半屋八間木香亭在畏吾兒殿後東盥殿在延華閣東版垣外正殿五間前軒三間東

西六十五尺深三十九尺柱廊二間深二十六尺寢殿
三間東西四十八尺前宛轉置花朱闌八十五扇殿之
旁有盞頂房三間庖室二間面陽盞頂房三間妃嬪庫
房一間縫紉女庫房三間紅門一盞頂之制三椽其頂
若筍之平故名西盞頂殿在延壽閣西版垣之外制度
同東殿東殿之旁有庖室三間好事房二各三間獨脚
門二紅門一妃嬪院四二在東盞頂殿後二在西盞頂
殿後各正室三間東西夾四間前軒三間後有三椽半

屋二間侍女室八十三間半在東妃嬪院左西向半在
西妃嬪院右東向室後各有三椽半屋二十五間東蓋
頂殿紅門外有屋三間蓋頂軒一間後有蓋頂房一間
庖室一區在凝暉樓後正室五間前軒一間後披屋三
間又有蓋頂房一間蓋頂井亭一間周以土垣前闢紅
門酒房在宮垣東南隅庖室南正屋五間前蓋頂軒三
間南北軒各三間西北隅蓋頂房三間紅門一土垣四
周之學士院在閣後四蓋頂殿門外之西偏三間生料

庫在學士院南又南為鞍轡庫又南為軍器庫又南為庖人牧人宿衛之室藏珍庫在宮垣西東隅制度並如酒室惟多盞頂半屋三間庖室三間

萬壽山在大內西北太液池之陽金人名瓊華島中統三年修繕之至元八年賜今名其山皆疊玲瓏石為之峯巒隱映松檜隆鬱秀若天成引金水河至其後轉機連軒汲水至山頂出石龍口注方池伏流至仁智殿後有石刻盤龍仰首噴水仰出然後右東西流入於太液

池山前有白玉石橋長二百餘尺直儀天殿後橋之北有玲瓏石擁木門五門皆為石色內有隙地對立日月石西有石棋枰又有石坐牀左右皆有登山之徑縈紆萬石中洞府出入宛轉相迷至一殿一亭各擅一景之妙山之東有石橋長七十六尺濶四十一尺半為石渠以載金水而流於山後以及於山頂也又東為靈圃奇獸珍禽在焉廣寒殿在山頂七間東西一百二十尺深六十二尺高五十尺重阿藻井文石甃地四面瑣牕版

密其裏編綴金紅雲而蟠龍矯蹇於丹楹之上中有小
玉殿內設金嵌玉龍御榻左右列從臣坐牀前架黑玉
酒甃一玉有白章隨其形刻為魚獸出沒於波濤之狀
其大可貯水三十餘石又有玉假山一峯玉響鐵一懸
殿之後有小石笋二內出石龍首以嚙所引金水西北
有廁堂一間仁智堂在山之半三間高三十尺金露亭
在廣寒殿東其制圓九柱二十四尺尖頂上置琉璃珠
亭後有銅幡竿玉虹亭在廣寒殿西制度同金露方壺

亭在荷葉殿後高二十尺重屋八面重屋無梯自金露
亭前複道登焉又曰綠珠亭瀛洲亭在溫石浴室後制
度同方壺玉虹亭前仍有登重屋複道亦有綠珠亭荷
葉在方壺前仁智西北三間高三十尺方頂中置琉璃
珠溫石浴室在瀛洲前仁智西北三間高二十三尺方
頂中置塗金寶瓶圈亭又曰臘脂亭在荷葉稍西蓋后
妃添粧之所也八面介福殿在仁智東差北三間東西
四十一尺高二十五尺延和殿在仁智西北制度如介

福馬湏室在介福前三間牧人之室在延和前三間庖室在馬湏前東浴室更衣殿在山東平地三間兩夾太液池在大內西周回若干里植芙蓉儀天殿在池中圓坻上當萬壽山十一楹高三十五尺圍七十尺重簷圓蓋頂圓基址甃以文石藉以花裯中設御榻周闢瑣牕東西門各一間西北側堂一間臺西向列甃磚龕以居宿衛之士東為木橋長一百二十尺濶二十二尺通大內之夾垣西為木吊橋長四百七十尺濶如東橋中闕

之立柱架梁於二舟以當其空至車駕行幸上都留守
官則移舟斷橋以禁往來是橋通興聖宮前之夾垣後
有白玉石橋乃萬壽山之道也犀山臺在儀天殿前水
中上植木芍藥隆福宮西御苑在隆福宮西先后妃多
居焉香殿在石假山上三間兩夾二間柱廊三間龜頭
屋三間丹楹瑣牕間金藻繪玉石礎琉璃瓦殿後有石
臺山後闢紅門門外有侍女之室二所皆南向並列又
後直紅門並立紅門三三門之外有太子鄂爾多荷葉

殿二在香殿左右各三間圓殿在山前圓頂上置塗金寶珠重簷後有流杯池池東西流水圓亭二圓殿有廡以連之歇山殿在圓殿前五間柱廊二各三間東西亭二在歇山後左右十字脊東西水心亭在歇山殿池上直東西亭之南九柱重簷亭之後各有侍女房三所所為三間東房西向西房東向前闢紅門三門內立石以屏内外外築四垣以周之池引金水注焉棕毛殿在假山東偏三間後置頂殿三間前啟紅門立垣以區分之

儀鸞局在三紅門外西南隅正屋三間東西屋三間前
開一門

史官虞集曰嘗觀紀籍所載秦漢隋唐之宮闕其宏麗
可怖也高者七八十丈廣者二三十里而離宮別館綿
延聯絡彌山跨谷多或至數百所嘻真木妖哉由余有
言使鬼為之則勞神矣使人為之則苦人矣由余當秦
穆公時為是言俾見後世之侈何如也雖然紫宮著乎
玄象得無棟宇有等差之辨而茅茨之簡又烏足以重

威於四海乎集佐修經世大典將作所疏宮闕制度為
詳於是知大有逕庭於古也方今幅幘之廣戶口之夥
貢稅之富當倍秦漢而參隋唐也顧力有可為而莫為
則其所樂不在於斯也孔子曰禹吾無間然矣卑宮室
而盡力乎溝洫重於此而輕於彼理固然矣

中書省

吏部

戶部 都提舉萬億綺源庫 都提舉萬億賦源庫

都提舉萬億寶源庫 都提舉萬億廣源庫

提舉富寧庫 順承行用庫 文明行用庫 光

熙行用庫 健德行用庫 和義行用庫 大都

平準庫 寶鈔總庫 印造寶鈔庫 燒鈔西庫

燒鈔東庫 印造茶引局 抄紙局

禮部 會同館 教坊司 鑄印局 白紙坊 油

磨坊

兵部

刑部

工部

覆寶司

提舉都城所

提舉右八作司

提舉左八作司

備章總院

大都人匠總管府

大都等路諸色民匠總管府

紋繡總院

繡

局

諸路裱造總管府

奇達勒局諸色人匠總

管府

提舉諸司局

諸司局人匠總管府

大

都金銀器盒局

大都毬局

織染局

花毯蠟

布等局

簾局

薩達克齊等局人匠提舉司

造船提舉司

諸物庫

符牌庫

受給庫

左

右廂

樞密院

右衛親軍都指揮使司

左衛親軍都指

揮使司

中衛親軍都指揮使司

前衛親軍都

指揮使司

後衛親軍都指揮使司

武衛親軍

都指揮使司

蒙古侍衛親軍都指揮使司

虎

賁侍衛親軍都指揮使司

唐古侍衛親軍都指

揮使司

欽察侍衛親軍都指揮使司

珪齊侍

衛親軍都指揮使司 西域侍衛親軍都指揮使

司

御史臺 殿中司 察院

伊克扎爾固齊 司獄司

徽政院 宮正司 掌謁司 掌醫署 掌膳署

內宰司 備用庫 藏珍庫 掌儀署 文成庫

供須庫 儀從庫 衛侯庫 右都威衛使司

左都威衛使司 延慶司 隨路諸色人匠都

總管府 瑪瑙玉局 大都等路諸色民匠提舉
司 織染襍造人匠總管府 綾錦局 織染局
文綺局 諸路齊哩克民匠都總管府 大護
國仁王寺財用規運都總管府

宣徽院 尚舍監 諸物庫 尚食局 生料庫

光祿寺 尚醞局 尚飲局 醴源倉 關遺監

提舉太倉 柴炭提舉司 沙糖局

中政院 奉宸庫 宮領隨路民匠打鋪鷹房紬綿

總管府

集賢院 國子監 國子學 興文署

翰林院 國子監 國子學

翰林國史院

宣政院 資善庫

昭文館

太常寺 太廟署 太樂署 社稷署 禮直署

大司農司 廣濟署 豐贍署 供膳司 昌國署

濟民署

大都護府

通政院 廩給司

秘書監 著作局 秘書庫

大府監 內藏庫 右藏庫 左藏庫 器備庫

中尚監 資成庫 襍造局 諸色人匠提舉司 鐵

局 木局 齊哩克昆諸色人匠提舉司 大都等

路種田人匠織染局

利用監 資用庫 齊哩克昆皮局人匠提舉司 大

都襟造雙線局 熟皮局 貂鼠局 大都軟皮

局

章佩監 御帶庫 異珍庫

典瑞監

大都留守司兼少府監 修內司 大木局 小木

局 泥瓦局 粧釘局 銅局 車局 繩局

祇應局 畫局 油漆局 器備局 器物局

鐵局 儀鸞局 大都諸色人匠提舉司 犀象

牙局 雕牙局 雕木局 採石局 木場局

上林局 大都門尉

將作院 諸路金玉人匠總管府 玉局提舉司

瑪瑙局提舉司 石局 金絲子局 大小雕木

等局 鞋帶斜皮局 瓘玉局 畫局 溫犀玳

瑁局 漆紗冠冕局 珠子局 異樣等局總管

府 異樣紋繡兩局 綾錦織染兩局 金絲顏

料總庫 尚衣局 御衣局

泉府司 富藏庫

侍儀司 法物庫

武備寺 壽武庫 利器庫 甲匠提舉司 箭局

弦局

都水監 大都河道提舉司

尚乘寺 諸路祿造總管府 諸路旋匠提舉司

網簾局 資乘庫

太僕寺

太史院

司天臺

回回司天臺

太醫院

御藥局

御藥院

回回藥物院

回回

藥物局

大都惠民司

廣惠司

崇福司

拱衛直都指揮使司

儀從司

大司徒領異樣金玉人匠總管府 塑局 出鑄局

銀局 銅局 鑄瀉等銅局 唐像畫局 梵

像局 襍造提舉司 鑄鐵局 玉局 諸物庫

博克遜

儀鳳司 安和署

京畿都漕運使司 萬斯南倉 萬斯北倉 千斯

倉 相因倉 豐潤倉 通濟倉 廣備倉 永

平倉 永濟倉 惟億倉 盈衍倉 大積倉

豐實倉 廣衍倉 順濟倉

大都等路都轉鹽運使司 大都稅課提舉司

大都南北兩兵馬都指揮使司 北兵馬司

內史府

省架閣庫 左右部架閣庫 長信寺

天厯初建奎章閣於西宮興聖殿之西廊為屋三間高
明敞爽南間以藏物中間諸官入直所北間南嚮設御
座左右列珍玩命羣玉內司掌之閣官署御初名奎章

閣階正三品隸東宮屬官後文宗復位乃陞為奎章閣
學士院階正二品置大學士五員並知經筵事侍書學
士二員承制學士二員供奉學士二員並兼經筵官幕
職置參書二員典籤二員並兼經筵叅贊官照磨一員
內掾四名內二名兼檢討宣使四名知印二名譯史二
名典書四名屬官則有羣玉內司階正三品置監羣玉
內司一員司尉一員亞尉二員僉司二員典簿一員令
史二名典史二名司鑰二名司膳四名給使八名專掌

秘玩古物藝文監階正三品置太監兼檢校書籍事二員少監同檢校書籍事二員監丞參檢校書籍二員或有兼經筵官者典簿一員照磨一員令史四名典史二名專掌書籍鑒書博士司階正五品置博士兼經筵參贊官二員書吏一名專一鑒辦書畫授經郎階正七品置授經郎兼經筵譯文官二員專一訓教怯薛官大臣子孫藝林庫階從六品置提點一員副使一員司吏二名庫子一名專一收貯書籍廣成局階從七品置大使

一員副使一員直長二員司吏二名專一印行祖宗聖訓及國制等書特思剏製象齒小牌五十上書奎章閣三字一面篆字一面蒙古字與輝和爾字分散各官懸佩出入宮門無禁學士院凡與諸司往復惟劄送參書書廳行移而已命侍讀學士虞集撰記御書刻石閣中今上皇帝改奎章曰宣文其記曰大統既正海內定一乃稽古右文崇德樂道以天歷二年三月作奎章之閣燕閒之居將以淵潛遐思緝熙典學乃置學士員俾頌

乎祖宗之成訓毋忘乎創業之艱難而守成之不易也
又俾陳夫內聖外王之道興亡得失之故而以自警焉
其為閣也因便殿之西廡釋高明而有容不加飾乎彩
斲不重勞於土木不過啟乎戶牖以順清燠樹皮閣以
棲圖書而已至於器玩之陳非古制作中法度者不得
在列其為處也跬步戶庭之間而清嚴邃密非有朝會
祠享時巡之事幾無一日而不御於斯於是宰輔有所
奏請宥密有所圖維爭臣有所繩糾侍從有所獻替以

次入對從容密勿蓋終日馬而聲色狗馬不軌不物者
無因而至前矣自古聖明睿知善於怡心養神培本浚
源泛應萬變而不窮者未有易乎此者也蓋聞天有恒
運日月之行不息矣地有恒勢水土之載不匱矣人君
有恒居則天地民物有所係屬而不易矣居是閤也靜
焉而天為一動焉而天弗違庶乎有道之福以保我子
孫黎民於無窮哉至順辛未孟春二日記

歷代帝王宅京記卷十九

欽定四庫全書

歷代帝王宅京記卷二十

崑山顧炎武撰

遼陽

遼

遼史地理志曰東京遼陽府本朝鮮之地周武王釋箕子囚去之朝鮮因以封之傳四十餘世燕屬真番朝鮮始置吏築障秦屬遼東外徼漢初燕人滿王故空地武

帝元封三年定朝鮮為真番臨屯樂浪玄菟四郡後漢
出入青幽二州遼東玄菟二郡沿革不常漢末為公孫
度所據傳子康孫淵自稱燕王建元紹漢魏滅之晉陷
高麗後歸慕容垂子寶以句麗王安為平州牧居之元
魏太武遣使至其所居平壤城唐高宗平高麗於此置
安東都護府後為渤海大氏所有大氏始保挹婁之東
牟山武后萬歲通天中為契丹盡忠所逼有乞乞仲象
者度遼水自固武后封為震國公傳子祚榮建都邑自

稱震王併吞海北地方五千里兵數十萬中宗賜所都
曰輝罕州封渤海郡王十有二世至曩震僭號改元擬
建宮闕有五京十五府六十二州為遼東盛國忽汗州
即故平壤城也號中京顯德府太祖建國攻渤海拔輝
罕城俘其王大諲譔以為東丹王國立太子托雲為人
皇王以主之神冊四年葺遼陽故城以渤海漢戶建東
平郡為防禦州天顯三年遷東丹國民居之升為南京
城名天福高三丈有樓櫓幅員三十里八門東曰迎陽

東南曰韶陽南曰龍源西南曰顯德西曰大順西北曰大遼北曰懷遠東北曰安遠宮城在東北隅高三丈具敵樓南為三門壯以樓觀四隅有角樓相去各二里宮牆北有讓國皇帝御容殿大內建二殿不置宮嬪惟以內省使副判官守之大東丹國新建南京碑銘在宮門之南外城謂之漢城分南北市中為看樓晨集南市夕集北市街西有金德寺大悲寺駙馬市鐵幡竿在焉趙頭陀寺留守衙戶部司軍巡院歸化營軍千餘人河朔

亡命皆籍於此東至北烏爾呼赫四百里南至海邊鐵
山八百六十里西至望平縣海口三百六十里北至挹
婁縣范河二百七十里東西南三面抱海遼河出東北
山口為范河西南流為大口入於海東梁河自東山西
流與渾河合為小口會遼河入於海又名太子河亦曰
大梁水渾河在東梁范河之間沙河出東南山西北流
徑蓋州入於海有蒲河清河淇河亦曰泥河又曰蘄芋
灤水多蘄芋之草駐蹕山唐太宗征高麗駐蹕其巔數

日勒石紀功焉俗稱手山山巔平石之上有掌指之狀
泉出其中取之不竭又有明王山白石山亦曰橫山天
顯十三年改南京為東京府曰遼陽

金

金史地理志曰皇統四年二月立東京新宮寢殿曰保
寧宴殿曰嘉惠前後正門曰天華曰乾貞七月建宗廟
有孝寧宮七年建御容殿

置留守司

大定

遼

遼史地理志曰中京大定府虞為營州夏屬冀州周在幽州之分秦郡天下是為遼西漢為新安平縣漢末步奚居之幅員千里多大山深谷險阻足以自固魏武北征縱兵大戰降者二十餘萬去之松漠其後拓跋氏乘遼建牙於此當饒樂河水之南溫渝河水之北唐太宗伐高麗駐蹕於此部帥蘇支從征有功奚長可度率眾內附為置饒樂都督府咸通以後契丹始大奚族不敢

復抗太祖建國舉族臣屬聖宗嘗過七金山土河之濱
南望雲氣有郭郭樓闕之狀因議建都擇良工於燕薊
宮掖樓閣府庫市肆廊廡擬神都之制統和二十四年
五帳院進故奚王牙帳地二十五年城之實以漢戶號
曰中京府曰大定皇城中有祖廟景宗承天皇后御容
殿城池湫濕多鑿井泄之人以為便大同驛以待宋使
朝天館待新羅使來賓館待夏使有七金山馬盂山雙
山松山土河

宋王曾上契丹事曰出燕京北門至望京館五十里至順州七十里至檀州漸入山五十里至金溝館將至館川原平曠謂之金溝淀自此入山詰曲登陟無復里候但以馬行記日約其里數九十里至古北口兩旁峻崖僅容車軌又度德勝嶺盤道數層俗名思鄉嶺八十里至新館過雕窠嶺偏槍嶺四十里至如來館過烏灤河東有灤州又過黑斗嶺度雲嶺芹菜嶺七十里至柳河館又過松亭嶺甚險峻七十里至打造部落東南行五

十里至牛山館八十里至鹿兒峽館過蝦蟆嶺九十里至鐵漿館過石子嶺自此漸出山七十里至富谷館八十里至通天館二十里至中京大定府城垣卑小方員纔四里許門但重屋無築閣之制南門曰朱夏門內通步廊多坊門又有市樓四曰天方大衢通園望闕次至大同館其門正北曰陽德閭闔城內西南隅岡上有寺城南有園圃宴射之所自過北口居人草庵板屋耕種但無桑柘所種皆從隴上虞吹沙所壅山中長松鬱

然深谷中時見畜牧牛馬橐駝多青鹽黃豕

金

金史地理志曰大定府遼統和二十五年建為中京國
初因稱之海陵貞元元年更為北京置留守司都轉運
司警巡院

會寧

金

金史地理志曰上京路即海古之地金之舊土也國言

金曰愛新以松阿哩水源於此故名金源建國之號
蓋取諸此國初稱為內地天眷元年號上京海陵貞祐
二年遷都於燕削上京之號止稱會寧府稱為國中者
以違制論大定十三年七月復為上京其山有長白青
嶺瑪紀嶺溫都爾水有安春水混同江來流河松阿哩
江鴨子河

其宮室有乾元殿天會三年建天眷元年更名皇極殿
慶元宮天會十三年建殿曰辰居門曰景暉天眷元年

安太祖以下御容為原廟

朝殿天眷元年建殿曰敷德門曰延光寢殿曰宵衣書
殿曰稽古又有明德殿熙宗嘗享太宗御容於此太后
所居也

涼殿皇統二年構門曰延福樓曰五雲殿曰重明東廡
南殿曰東華次曰廣仁西廡南殿曰西清次曰明義重
明後東殿曰龍壽西殿曰奎文時令殿及其門曰奉元
有泰和殿有武德殿有薰風殿

其行宮有天開殿文刺春水之地也有混同江行宮太廟社稷皇統三年建正隆二年毀

原廟天眷元年以春亭名天元殿安太祖太宗徽宗及諸后御容春亭者太祖所嘗御之所也天眷二年作原廟皇統七年改原廟乾文殿曰世德正隆二年毀大定五年復建太祖廟

興聖宮德宗所居也天德元年名之興德宮後更名永祚宮睿宗所居也光興宮世宗所居也正隆二年命吏

部郎中蕭彥良盡毀宮殿宗廟諸大族邸第及儲慶寺
夷其址耕墾之大定二十一年復修宮殿建城隍廟二
十三年以覽東其城有皇武殿擊毬校射之所也有雲
錦亭有臨猗亭為籠鷹之所在按出虎水側

大金國志曰女真之初無城郭國主嘗浴于河牧于野
屋舍車馬衣服飲食之類與其下無異國主所獨享者
惟一殿名曰乾元所居四外栽柳以作禁衛而已其殿
宇繞壁盡置火坑平居無事則鎖之或時開鑰則與臣

金史卷之二十一
卷二十一
下坐於坑后妃躬侍飲食

又曰國初無城郭星散而居呼曰皇帝寨國相寨太子
莊後升皇帝寨為會寧府建為上京城邑宮室無異於
中原州縣廨宇制度極草創居民往來車馬雜遝自前
朝門直抵後朝門盡為往來出入之路畧無禁制每孟
春擊土牛父老士庶無長幼皆聚觀於殿側民有訟未服
多邀駕以訴至熙宗始有內庭之禁

又曰皇統六年春三月上以上京會寧府內太狹纔如

郡制遂役五路工匠撤而新之規模雖倣汴京然僅得十之二三而已

許亢宗行程錄曰

宋著作郎以宣和六年使金賀太宗登位

自雄州至上京

會寧府二千七百五十里自雄州六十里至新城縣六十里至涿州六十里至良鄉縣六十里至燕山府八十里至潞縣七十里至三河縣六十里至薊州七十里至玉田縣九十里至韓城鎮五十里至北界清州

金國新立地界

九十里至灤州四十里至望都縣六十里至營州一百

里至潤州八十里至遷州九十里至習州九十里至來
州八十里至海雲寺一百里至紅花務九十里至綿州
八十里至劉家莊一百里至顯州九十里至兔兒塢六
十里至梁魚務一百三里至摩綽寨八十里至潘州七
十里至興州九十里至咸州九十里至同州三十里至
信州九十里至富埒瑋貝勒寨四十里至黃龍府六十
里至托色貝勒寨九十里至滿扎勒貝勒寨一百里至呼
勒希寨九十里至矩古貝勒寨七十里至達河寨四十

里至富塔寨五十里至館館去北庭十里一望平原曠
野間有居民千餘家近闕北有阜圍繞三數頃高丈餘
云皇城也山棚之左曰桃源洞右曰紫微洞中作大牌
曰翠微宮高五七丈建殿七棟甚壯榜額曰乾元殿階
高四尺土壇方濶數丈名曰龍墀

雲麓漫抄曰燕京東行六十里至潞縣九十里至三河
縣七十里至薊州八十里至永濟務九十里至七箇嶺
九十里至平州八十里至新安縣六十里至潤州自此

皆沿海行四十里至遷州八十里至棗州八十里至隰
州八十里至洵河島八十里至胡家務八十里至新城
八十里至梯已寨三十里至廣寧府三十里至顯州五
里至東館八十里至兔兒塢八十里至梁虞務六十里
至遼河大口平津館七十三里至廣州廣平館復望北
行七十里至潘州樂郊館八十里至興州興平館五十
里至銀銅館九十里至咸州咸平館三十里至宿州宿
寧館八十里至賈道鋪懷方館四十里至楊八寨通遠

館五十里至和碩貝勒鋪同風館三十六里至義和館
五十里至如歸館四十里至信州彰信館七十里至勝
州來德館五十里至山寺鋪會方館五十里至威州威
德館五十里至龍驤館六十里至詳州常年館六十里
至濱州混同館六十里至高平館四十里至同流館五
十里至穆特赫貝勒來同館七十里至烏龍館三十里
至虜寨號御寨今之使虜者止至燕未有至烏龍館者
于慎行曰上京會寧府即今三萬衛也

開平

元

元史地理志曰上都路唐為奚契丹地金平契丹置恒州元初為扎拉爾部烏魯郡王營幕地憲宗五年命世祖居其地為巨鎮明年世祖命劉秉忠相宅於恒州東灤水北之龍岡中統元年為開平府四年以闕庭所在加號上都歲一幸焉至元二年置留守司五年升上都路總管府十八年升上都留守司兼行本路總管府事

元史陳祖仁傳曰至正二十年五月帝欲修上都宮闕
工役大興祖仁上疏其畧曰自古人君不幸遇艱虞多
難之時孰不欲奮發有為成不世之功以光復祖宗之
業苟或上不奉於天道下不順於民心緩急失宜舉措
未當雖以此道持盈守成猶或致亂而況欲撥亂世而
反之正乎夫上都宮闕勦自先帝修於累朝自經兵火
焚燬殆盡所不忍言此陛下所為日夜痛心所宜亟圖
興復者也然今四海未清瘡痍未瘳倉庫告虛財用將

竭乃欲驅疲民以供大役廢耕耨而荒其田畝何異扼其吭而奪之食以速其斃乎陛下追維祖宗宮闕念茲在茲然不知今日所當興復乃有大於此者假令上都宮闕未復固無妨於陛下之寢處使因是而違天道失人心或至大業之隳廢則夫天下者亦祖宗之天下生民者亦祖宗之生民陛下亦何忍輕棄之乎願陛下以生養民力為本以恢復天下為務信賞必罰以驅策英雄親正人遠邪佞以圖謀治道夫如是則承平之觀不

日咸復詎止上都宮闕而已乎疏奏帝嘉納之



歷代帝王宅京記卷二十